



# STINAPA TA INFORMA

## PREPARASHON DI TERENO PA KONSTRUÍ

Mayoria biaha, un hende ku ta haña un pida tereno pa traha kas, ta kuminsá ku rosa e tereno kompletamente. Normalmente esei ta tuma lugá ku un buldozer òf loader. Tur mata, yerba i palu ta bai landfill. “Asina ta hasi limpi” sa bisa e ora ei. Pero aunke un tereno rosá por mustra “limpi”, e tin desbentaha grandi pa ser humano i naturalesa. Ora ku no tin vegetashon riba suela, bo ta haña eroshon. Esei kemen ku e lag di tera mas ariba ku tin hopi nutrishon pa mata ta disparsé parsialmente òf te asta kompletamente. Den temporada seku bientu ta supla e tera aki bai kuné. Pasobra no tin mata òf palu pa kibra e bientu i pa tene e tera ku nan rais. Un pida tereno bashí ta sòru pa hopi stòf fini. E stòf ei ta bai tur kaminda, pero tambe den kas di bo futuro bisina òf riba su outo nèchi labá! Den temporada di áwaseru no ta bientu pero áwaseru ku ta spula e lag di tera nutritivo bai kuné. Kada biaha ku awa kai, pida tera chikitu ta bai laman. E awa den roinan ta maron di tera ku lodo. No tin palu òf mata pa kibra kaida di áwaseru riba tera ku ta los e tera for di suela, ni tampoko nan rais ku ta tene e tera. Di e manera aki hopi tera ta disparsé. Baranka sunú ta keda atras. Asina naturalesa ta bai atras. Pasobra nos ta biba riba un isla, finalmente tur e tera ku a lòs ta laba bai laman. Einan e ta duna otro problema; e ta forma un menasa mortal pa nos refnan di koral. Koral mester di lus di solo, pues awa limpi, pa e biba i krese. E pidanan di tera ta choka e animalitonan ku ta forma e koral. No ta un kasualidat ku koral ta bai atras mas tantu den áreanan kaminda tin konstrukshon. Rosamentu di un tereno por tin konsekuensianan grave pues. Pero riba un tereno ku vegetashon bo no por konstruí. Pero ta kon mester hasi anto? Dor di limpia tereno na un otro manera! Limpia solamente e tereno ku bo mester di bèrdat pa konstruí bo kas. E palunan ku matanan den besindario ta forma un bon komienso di bo futuro kurá. Asina bo ta skapa plaka i tempu. Bo no tin nodi di planta hopi. Fuera di esei e vegetashon krioyo no mester di hopi awa. Palunan ku tei kaba mester snui un tiki so. Nan ta duna sombra agradabel i ta tene e kas fresku. No kuminsá muchu trempa ku rosamentu di bo tereno tampoko. Kuminsá ku esei djis promé ku bo kuminsá berdaderamente ku konstrukshon di e kas. Si nos limpia tereno di e manera aki den futuro ta mihó pa bo pòtmòni! I tambe pa naturalesa, tantu riba tera komo den laman.

*Kontra arestá eroshon ta un inisiativa di ‘Natuurbeleidsplan van Bonaire’ (Plan di Maneho di Naturalesa Boneiru) Pa mas informashon: [www.mina.vomil.an/welcome/islands/bonaire\\_legislation.php](http://www.mina.vomil.an/welcome/islands/bonaire_legislation.php) òf yama Departamentu Milieu- en Natuurbeheer di DROB 717 - 8130*

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURALESA



**Traha huntu na un desaroyo duradero pa Boneiru**